開放文學 -- 風土人情 -- 殊域周咨錄 第七卷 南鑾

◎占城 占城國,古越裳氏界。本秦郡象林縣地;漢為象林林邑縣,屬日南郡。漢末,有區連者,殺縣令自立,僭稱林邑國王。遂不入版圖。孫吳時通使。後其國傳外孫范熊,熊傳子逸。被其臣范推之奴用事,贊逐諸子於逸。逸死,奴冒范氏族名文,篡奪之,攻並旁國。晉永和中,攻陷日南,求日南故北鄙地於交州刺史朱藩,以橫山為界。既而交州刺史楊平同九真太守灌邃討之。文子佛敗走,官軍追至其國。佛請降。其後復強,侵暴日南九真諸郡,無歲不至交州,疆域遂日大,延袤至三千里,或曰千里。文傳至玄孫,為扶南王所殺。國臣范諸農平其亂而自立,傳子陽邁,乍臣乍叛於中國。晉元嘉中,文帝使宗慤、擅和之往伐。陽邁懼,願輸金一萬斤,銀十萬斤,銅三十萬斤,還所掠日南戶以納款,其大臣諫止之;乃復遣大帥范扶龍戍北界區栗城以拒晉。晉前鋒蕭景憲奪據其城,乘勝入象浦。陽邁出師驅象來戰,慤制獅子形御之。象奔,師敗。陽邁父子遂脫身走。獲其國珍寶無算,消金人,歸黃金數十萬斤於朝。自是歷宋、齊、梁、陳、隋皆來修貢。隋仁壽末,復遣將劉方擊破之。國主范志棄城走,獲廟主十八枚,並鑄金為之,蓋其先有國以來十八世矣。方班師,范志復國。

至唐貞觀中,其孫鎮龍被弒。外戚諸葛地取之,更號環王。元和初,入寇安南騅、愛等州。都擴張丹擊破之。遂棄林邑,徙國於占,因號占城。周顯德中,亦來修貢。宋建隆二年,其王釋利因拖盤遣使來朝。貢表章書於貝多軒,盛以香木函。其後嗣王貢使不絕,宋亦厚賚之。政和中,授其王楊卜麻疊金紫光祿大夫,領廉白州刺史。楊卜麻疊言,身縻化外,不沾祿食,願得薄授俸給,壯觀小國。許之。宣和元年,進檢校司空兼御史大夫懷遠軍節度琳州管內觀察處置使,封占城國王。自是每遇恩輒降制如封邑。淳熙中,遣兵襲真臘,破之。慶元中,真臘大舉兵復讎。遂滅其國,俘殺臣民幾盡,更立真臘人以主之,因名占臘。元至元中,國主日字由補刺者吾,遣使歸附,貢方物。其子補的立,復負固不服,元數遣重兵臨之。又每遣使招諭。雖外示降款,中無順志。

本朝洪武元年,其主阿答阿者遣使虎都蠻來賀即位,貢虎象方物。命行人吳用、顏宗魯、楊載送使者歸,賜以璽書及《大統曆》、金綺等幣。書曰:「今年二月四日,虎都蠻奉虎象至。王之誠章,朕已具悉。然都蠻未至,朕之使已在途矣。朕之遣使,正欲報王知之。曩者我中國為胡人竊據百年,遂使夷狄佈滿四方,廢我中國之彝倫。朕既已發兵討之,遂二十年,芟夷既平,朕主中國,天下用安。恐番夷未知,故遣使以報諸國。不期王之使者先至,誠意至篤,朕甚喜焉。今以《大統曆》一本、織金綺、紗羅絹五十疋專人送使者歸。且諭王以道能奉若天命,使占城之人安於生業,王亦永保祿位,福及子孫。上帝實監之,王其勉圖勿怠。」

三年,安南舉兵侵佔城。阿答阿者遣平章蒲旦麻都奏聞。上遣翰林編修羅復仁、兵部主事張福齎詔諭安南並占城曰:「朕本布衣,因天下亂,起兵以保鄉里。不期豪傑雲從,朕將數年,闢土日廣,甲兵強盛,遂為臣庶推戴,君臨天下,以承正統,於今三年。海外諸國入貢者,安南最先,高麗次之,占城又次之。皆能奉表稱臣,合於古制,朕甚嘉焉。近占城遣平章蒲旦麻都來貢,言安南以兵侵攘。朕觀之心有不安,念爾兩國自古及今,封疆有定分,不可強而為之一,此天意也。況爾等所居之地,相去中國越山隔海。所言侵擾之事,是非一時難知。以朕詳之,爾彼此世傳已久,保土安民,上奉天道,尊事中國,爾前王必有遺訓,不待諭而知者。朕為天下主,治亂持危,理所當行。今遣使往觀其事,諭以畏天守分之道。如果互執兵端,連年不解,荼毒生民,上帝好生,必非所悅。恐天變於上,人怨於下,其禍有不能逃者。二國之君,宜聽朕言,各遵其道,以安其分。庶幾爾及子孫皆享福於永久,豈不美歟!」詔至,兩國皆聽命罷兵。乃遣中書管勾甘桓、會同館副使路景賢齎詔印,封阿答阿者為占城國王。上又以占城通中國文字,遣使頒科舉詔於其國。

按《宋史》紀占城制文吏五十餘員,有郎中、員外、秀才之稱,分掌資儲寶貨等事。詳具《五代史》,則其國雖無科舉之事,而亦知文教之崇久矣,故國人多有能詞翰者。如《近峰聞略》所載占城使人入貢詩,其《初發》云:「行盡河橋柳色邊,片帆高掛遠朝天。未行先識歸心早,應是燕山有杜鵑。」其《揚州對客》云:「三月維楊富風景,暫留佳客與同牀。黃昏二十四橋月,白髮三千餘丈霜。玉句詩聞賢太守,紅蓮書寄好文章。欲尋何遜舊東閣,落盡梅花空斷腸。」其《江樓留別》云:「青嶂俯樓樓俯渡,遠人送客此經過。西風楊子江邊柳,落葉不如離思多。」又常寓蘇之天王堂,見葵花不識,問其名,人紿之謂一丈紅花。即題云:「花於木槿渾相似,葉比芙蓉只一圖犬。五尺欄杆遮不盡,獨留一半與人看。」又《濯纓亭筆記》亦載宋亡後,沈敬之逃占城,乞兵興復,占城以國小辭。敬之效秦庭之哭而不得,乃留居其國。占城賓之而不臣,敬之憂憤發病卒。其王作詩挽之曰:「慟哭江南老鉅卿,春風拭淚為傷情。無端天下編年月,致使人間有死生。萬疊白雲遮故國,一杯黃土蓋香名。英魂好逐東流去,莫向邊隅怨不平。」觀此則占城不惟粗通文墨,而且敦重節義。不惟其臣有詩才,而其主亦善篇章。彬彬乎聲名文物,匹於朝鮮,超於日本遠矣。我太祖科舉韶之頒,真不鄙陋其人,而欲納之於合教同文之盛也。宜哉!

四年,王遣其臣答班瓜卜農來朝。表用金葉,長一尺餘,闊五寸,刻以本國書。俾譯者譯之,其意請給兵器、樂器、樂人,欲使安南知為聲教所被,輸貢之地,則不敢欺凌。上以兵器雖不足惜,但二國互爭,而朝廷獨與占城,則是助爾相攻,甚非撫安之義。又所請樂人,在聲律雖無中外之殊,而語音則有華夏之異,難以發遣。命中書移咨國王,令其國有能習中土華言可教以音律者,選擇數人至京習之。並論福建行省,占城海泊貨物皆免其徵,以示懷柔之意。

八年,上以占城與爪哇等國貢使,每至中國,為商多行譎詐,詔禁阻之。

十三年,遣子入貢,賀萬壽聖節。諭其勿與安南國交兵。

十六年,遣使齎勘合文冊與之。

二十四年,入貢。以其國弒立,絕之。

永樂元年,遣使告諭即位。其王占巴的賴遣使奉金葉表文來賀,入貢方物。且言被安南侵掠,乞降敕往諭。上遣行人蔣賓、王 樞使其國報之,賜以絨錦、織金、文綺、紗羅,仍諭安南王胡■使息兵修好。

四年,敕廣東都指揮司選精兵六百人,以能幹千百戶領之,具器甲糗糧,由海道往占城,會兵伐安南。又遣中使馬彬等齎敕,賜以鍍金銀印及紗絹、金帶、黃金百兩、白金百兩、織金、文綺衣二襲並諸色幣。國王占巴的賴既出兵,復遣中官王貴通齎賜往勞之。賜白金三百兩、彩幣二十表裡。

五年,占巴的賴已復安南所侵地。又得黎氏父子及其黨惡,獻俘貢方物謝恩。詔嘉獎之。

六年,國王遣其孫舍楊該奉表貢象及方物。比還,賜真金印及黃金百兩、白金五百兩、錦綺紗羅五十疋、彩絹百疋。自是屢表 貢犀象及金銀器物。

七年,命中官鄭和等往賜其國。和統官兵二萬七千餘人,駕海舶四十八號,是歲秋九月,自太倉劉家港開船,十月至福建長樂太平港停泊。十二月於五虎開洋。張十二帆,順風十晝夜,至占城國。其國臨海,有港曰新州(西抵交■,北連中國地)。海船到彼,其酋長頭戴三山金花冠,身披錦花手巾,臂腿四腕俱以金鐲,足穿玳瑁履,腰束八寶方帶,如妝塑金剛狀。乘象,前後擁蕃兵五百餘。或執鋒刃短槍,或舞皮牌,槌鼓吹椰殼筒。其部領皆乘馬,出郊迎詔。下象膝行,匍匐感恩。

按《七修稿》載淮安清江浦廠中草園地上有鐵錨數枚,大者高八九尺,小亦三四尺者,不知何年之物。相傳永樂間,三保太監下海所造。兩淋日炙,無點發之钅宿。視之真如銀鑄,光澤猶日用於世者。愚意此必良鐵為之,故其色精瑩如此。舉一物之堅巨,而他物可推矣。其功費之靡濫何算也!又三保之稱不知係是鄭和舊名,抑豈西洋私尊鄭和、王景弘、侯顯等為三太保,故耶?

八年,王復遣使濟標等貢象及金銀器物。詔馬彬等送濟標還國,仍齎敕以文幣賜之。

十一年,國王又遣其孫舍阿那沙等入貢。兵部尚書陳洽言:「初討黎賊及陳季擴之時,占城國王雖聽命出兵,然實懷二心。圖

唇齒相依,徘徊觀望,愆期不進。及進至化州,大肆擴掠。以金帛戰象資陳季擴。季擴遺以美女,復約季擴舅陳翁挺等三萬餘為黨,侵奪昇華府所隸四州十二縣,厥罪與交■等,請發兵討之。」上以出師路由交阻,交民方安業,不忍用兵,遠勞供給。但遣使齎敕諭占巴的賴而已。先是占城定三年一貢之期,與安南國同。是歲遣行人往勞之。自後國王嗣位,必請命於朝。亦遣使行禮。十六年,國王遣使貢瑞象。翰林儒臣金幼孜作賦獻上,以表聖應(賦有序)。

序曰:「恭惟皇上膺受天命,統紹洪基,仁布寰宇,化週六合。是以扶桑月窟之境,雕題窮發之地,莫不梯山航海,奔走來 貢。蓋自三代以降,未有盛於今日者也。乃永樂十六年秋九月庚戍,占城國以象來進。其狀瑰詭雄壯,玄膚玉潔,文有白章,粲若 華星,鬱如雲霞。拜跪起伏,馴狎不驚,斯實希世之上瑞,天下太平隆盛之徵。夫百獸之中,其強悍勇猛者,莫逾於象。非若虎豹 熊罷之屬,可以力制。今占城以是象來貢,既有以見其形質之美,而其馴擾狎習,似與仁獸無異。於以見聖德之廣大,被於幽遠, 草木鳥獸咸沐恩光。而其感化之妙,固與鳳凰來儀百獸率舞者同一效驗之大矣。臣忝職詞垣,幸際聖明,屢睹嘉祥之盛,不可無紀 述以詠歌太平。謹拜手稽首而獻賦曰:『惟我皇明,受天命,臨寶位,洽文德,隆至治,際天蟠地,覆冒無外。明無幽而不燭,化 無遠而弗被,惟諸福之畢來,致嘉禎之駢萃。羌萬國以來庭,咸與琛而奉贄。或貢以威鳳祥麟,或獻以錦豹靈犀,或進以渥窪龍文 之天馬,或奉以西域卷鬣之神獅。其他若瑤琨、球琳、大貝、明珠、珊瑚、瑪腦、琥珀、■車■渠,珍奇異產。海委河輸,紛香■ 耀,雜然前陳,則又不可以備書也。粤有巨獸,魁然其狀,潛海濱以迴翔,匿長林而自放,勢侔山嶽之穹窿,力抵萬鈞之雄壯。其 生也大塊孕其真,至和毓其精,瑤光助其神,斗宿濯其英。然後走百神,集眾靈,播休氛;協嘉禎,忽乘雲而下降,條天開而日 晶,彩■攵■攵而燁煜,文璨璨而■■■,耿繁星之布滬,瑩雪花而繽紛。如肪之潔,如玉之溫,經以白理,緯以玄黃,修眾彩以 交互,紛五色而成章。炳炳蔚蔚,熠熠煌煌,六甲為之呵衛,五丁為之贊襄,岳祗因之而獻瑞,坤珍以之而效祥。於是番酋夷長睨 之而惕驚,象胥虞人望之而辟易。不假■幾檻而自致,匪藉尉羅而自格。乃告神明,涓吉日,載之以蔽空之長舟,藉之以幕雲之文 席,左叱陽侯,右麾海伯,風師前驅而縮恧,天吳後從而匍匐,迅飈為之帖息。魍魎竊伏以藏形,■■遠引而遁跡。■星馳而雲 駛,逾萬里於倏忽。沭恩光於九重,近龍顏於咫尺。觀其拜跽有常,動止有節,既容與而弗驚,亦安舒而自帖。萬姓為之駿奔,百 僚為之欣悅。麒麟參之以翱翔,騶虞隨之而蹩█薜。於以導乘,與服鸞輅,備萬舞,協韶█,宣人文,韶皇度。兆至德之楨符,綿 萬年之寶祚,囿斯世於泰和,措群生於豐遂,熙鴻化以彌流,■聖心而祗畏。將以明刑弼教,保民圖治,答景貺於上天,眙嘉猷於 後世,又豈徒誇盛美侈多瑞,為目前之奇玩而已哉!臣忝廁列於禁垣,幸瞻依於日月,愧學術之粗疏,莫形容於萬一。爰纘述於見 聞,翼具存於事實,楊盛世之休嘉,著無前之偉績。祝聖壽以悠長,頌皇圖於無極。為之頌曰:「惟皇神聖,上帝之命,統臨萬 方,靡不從命。維帝監觀,禎祥之格,丕昭神化,洽此文德。皇不自聖,益敬於天,匪象之瑞,所瑞惟賢。大哉皇仁,覃被八弦。 如天之行,如日之升。上帝之歆,協於皇德。億萬斯年,其永無<■攵>。」

宣德元年,行人黃原昌頒正朔至其國。王儀度稍弗恪。原昌人,端坐責之,詞明氣壯。王叩首謝罪。贈以金帛奇物。悉■之。及還,覆命。承顧問,悉以正對。上大悅,升戶部員外郎。

按原昌,福建楚溪人。永樂乙未進士,為人持重有氣節;既奉使還,時奔競之風甚熾,原昌恥隨流俗浮沉,遂請老以歸。正統六年,國王卒,嗣子摩訶貴由請襲爵。上賜敕詔,遣給事中舒某(失其名)為正使,及副使行人吳惠往封之。是冬十二月廿三日,發東管。次日過烏豬洋,又次日過七州洋,■■見銅鼓山。次日至獨豬山,■■見大周山。次日至交■界,有巨州橫絕海中,怪石廉利,風橫,舟觸之即靡碎,舟人甚恐。須臾風急過之。次日至占城外羅洋校■墅中。廿九日,王遣頭目迎詔,寶船象駕,鼓吹填咽,旌旄■奄靄,■衣椎髻,前後奔馳,至行宮設宴。王乘象迓於國門,戴金花冠,纏瓔珞,環帳列戈戟,以群象為衛。既宣詔,王稽首受命。是時臘月,其國猶暑。民多裸袒,士著苧衣。南阡稻熟,北秧猶青。七年正月上元夜,王請賞煙火。藝沉檀,燃火樹,盛陳樂舞。每夜鼓以八更為節。五月六日還,至七州洋,大風舟幾覆。正使舒某憂泣,不知所為,惠為文以祭祝融與夭妃之神。俄而開霽,■■見廣海諸山。十五日遂收廣海,復抵東莞。

按吳惠字孟仁,東吳人。年二十,以糧役管運至京,途中日歌古詩。或言於縣令,令奇之,名為弟子員。舉永樂甲辰進士。洞庭有進士自惠始。授行人,喜言事。使占城還,升桂林守。義寧峒蠻楊氏結苗人為亂,藩臬議進兵徵之。惠止之曰:「義寧吾屬,吾往撫之。不從,用兵未晚。」乃肩輿從十餘人,入其峒,山石攢峭如劍戟。傜人騰躍如飛,聞太守至,奔告於其酋出迓。惠諭之曰:「吾若屬父母也,宜聽吾語。」眾唯唯。惠因為陳逆順禍福。楊氏諸蠻感泣,留數日,歷觀諸屯形勢,以數千人衛出境,歸報罷兵。明年,武岡州盜起,宣言推義寧峒主為帥。藩臬咸尤惠。惠曰:「吾當任其咎。」乃遣人至義寧。群傜從山巔望見惠使,即遙拜,言不敢反狀。且求雪武岡之誣,盜計遂阻。迄惠在郡,無敢騷竊者。後升廣東右參政,支正三品俸卒。愚調航海颶濤,非人力所及,而惠蹈險如常,不為舒某之駭亂。噫!雷兩弗迷,大舜所以為聖;遭風存敬,程子所以為賢。惠之度量,於此可見。其後峒夷之反覆難信,猶之海波不測也。惠處之坦然,皆自此度量推之耳,惠豈無所本哉!觀其日歌古詩,悠優諷詠,涵養性靈,中有素定者,故夷險一致,克定大事若是。語曰:誦詩三百,不能專對,授之以政不達,雖多亦奚為!今惠不惟專對於遠,又能達政於蠻。則其所歌,固可謂有用之文章。而縣令乃能識之於吟誦之間,亦異鑒也哉!抑因是知古人奉使列國,宴享之際,賦詩見志,占其所就,後竟不爽,諒有以大。又按詔使之往占城者,其人不一。而獨鄭和之舟跡載於《星槎勝覽》,吳惠之舟跡載於惠之日記,故等是之以見其道里所經,日月所歷,俾後使可據而行耳。且和由,命於東也江縣,至是是於於其為其孤原於,即以於

景泰末,摩訶貴由卒。其子■羅茶全遣使入貢請封。天順中,命給事中江彤、行人劉寅之齎敕往封。諭其砥礪臣節,賜以彩幣。國王■羅茶全遣使沙婆利奉表入貢,即賜敕並彩幣。

劉寅之,江西永新人。其父名髦,行誼端茂。永樂戊子,領鄉薦,會試下第。道遇澤水,一女子溺將沒,號救命。髦援之登舟,附載而歸,道中皎然不敢犯。逮家,婦迎問曰:「賈妾乎!」髦告之故。婦扣女,言:「本富族,今舉家葬魚腹矣。臧君子再生恩,請服婢役以報。」髦曰:「惡有是!吾力猶能返汝。」立命人送之還。至則茫茫大川耳。親識皆絕形跡,復載之來。髦命婦善善視,何為擇婿歸之。婦曰:「渠已無家。吾亦無後。君非構意室之,蹤使從人,未必勝君。殆亦天作之合,使其侍君櫛耳。」髦固不可。有知者勸諭數四,久之乃處副室。而生二子,長定之,次即寅之。兄弟文學相師友。寅之登景泰甲戍進士。使占城還,進員外郎,累升參政。定之為大宗伯,諡文定,為時名臣。而寅之聲望相頡頏,人稱二難云。夫觀髦一事而有三善:拯溺全生,仁也;同舟不亂,義也;必其無所歸而後納之,禮也。厚德所感,宜食其佳胤之報哉!

成化六年,安南國王黎灝與占城交兵。時占城盤羅茶全卒,其弟■羅茶悅嗣立。奏稱:「安南國差人索取犀象寶物,不從,起兵攻圍本國。提拿臣兄連妻小五十餘口,搶劫寶印,燒燬房屋,殺死軍民三百餘口,擴去男婦不計其數。差人占守本國地方。臣暫管國事,乞為賜印封王及敕安南放出擴國男婦人口。」廣東市舶提舉司右監丞韋春亦奏前事。請行禮部,差官奉敕齎去安南,戒渝國王黎灝息兵睦鄰。上詔且不差人,待安南使人來,寫敕與他齎去。

九年,上命工科右給事中陳峻等齎敕往占城國,封盤羅茶悅為王。為安南阻絕。峻等上疏曰:「臣等奉命於十年正月二十九日到占城。新洲港口把守俱是安南番人,不容進入。臣等見得蠻人不遜,令通事滿源等諭以出使占城國緣由。源等回報。番人言說,此港占城王退還我的安南國王,各立界牌把守,他自見在靈山為王。開船到靈山海面下碇,隨令滿源等上山訪問。要見■羅茶悅,有無實跡。回還報說山中遇見避兵人說,■羅茶悅一家俱被安南虜去。地方盡數占奪,改為交南州名色,又令小旗姚官康四散緝訪是實,開船回還。將齎賜印信並原捧詔敕進繳。」詔下兵部,會同五府、六部、都察院、通政司、大理寺等衙門,議得安南國來歲當朝,合候陪臣至日,行令通事詹升等將前項事情譯審明白,另行具奏。定奪。

先是安南國王黎灝亦奏:「占城國人乘船航海劫臣化州,房屋■儲入於烈火。除臣已差陪臣陳廷美齎本赴京陳奏外,成化六年 八月,占城國王■羅茶全又親率水步掩襲化州。七年正月,茶全大興忿兵,砍臣戍卒。臣潰圍力戰,茶全率眾而南。本年十一月十

二日,臣差陪臣阮德真齎本赴京具由陳奏。先於本年三月,茶全掃境內兵,復圖再舉。詭言從朝廷差使勘臣四川地方,碣石為標, 永息紛糾。親率象馬,圖欲破臣義州,使其弟■羅茶遂領游兵先行,茶全繼進。茶遂心赧氣挫,懼致喪敗,夜伏健兒殺之行帳,自 立為王。自是國內紛紛,人心好亂。頭目割據方面,鞠旅募兵倒戈相攻,殆無虛日。本年十二月初三日,臣欽蒙敕諭:『朕詳覽奏 章,深察事理,互相仇殺皆非保境安民之道。且爾安南與占城曾受朝廷爵土,世修職貢,為中國藩屏,豈可搆怨興兵,自相攻擊。 《春秋》責備。賢者是宜安分修理,保守境土,解怨息爭。先盡睦鄰之道,仍禁守邊頭目毋啟釁端,生事邀功。如欲假此為吞併 計,恐非爾國之福。』大哉日月無私之照,至哉父母均愛之仁。俾臣與占城俯仰熙■之天,偃息喧和之地。此遠臣之真情,國人之 畢願也!臣深感聖恩,恪遵天戒,禁戢邊吏,勿啟釁端,固守封疆,敢行報復!然茶遂自弒逆之後,群情瓦解,有眾心離。成化八 年正月,茶遂親至境上,差頭目翁舅虛計齎書於臣,謂其兄茶全害民違天,家覆國破,自取之咎,蕩折固宜,國人弗協。茶全憂懼 成疾,國人立弟茶遂掌攝國事,已遣使赴京齎金葉表文,永襲王爵。乞臣同往城下一盟,以提夷海門為界,北則為義州,南則為占 城北境。並乞臣援兵數千,擁立茶遂都於番地。臣謂解怨息爭,欽承聖訓。鄰國廢置,義不相干。乃差大頭目范慤與茶遂盟。茶遂 歸至屍耐海口,■羅茶悅子茶質苔來與其頭目潛率傜峒之人,夜伏竹弩攻茶遂軍。占人自驚,茶遂為亂兵所殺。茶質苔來自立為 主,移都晶持。法令雖嚴,人愈作叛,亂臣強盜自稱為君長者幾十人。有稱摩訶支麻孑勞冰者,有稱麻訶左皮羅撥者,二黨驅象弄 兵,迫臣邊地,其餘亦各據地方。臣差頭目陳極齎書於左皮羅撥議和,求舒邊患,即為支麻彳勞冰邀殺。臣恐兵連禍結,罪干天 朝,戒戢守邊頭目益圖守禦,不許進兵。且占城為國,東抵於海,西逼傜蠻,北界臣義州,南與龜、■二部接壤。占城、■部仇隙 有年。自是▇部傜蠻樂占城亂,率眾搶掠,千百為群,道路不通,村墟岑寂。臣日夜思惟,自以欽承聖訓。息兵睦鄰,而遭彼國中 微,潰亂無主,更相吞噬。意困臣邊,乃遣頭目劉寶齎臣書往與茶質苔來約堅鄰好,共享太平。安分畏天,為聖朝藩屏。境土既 定,豈可爭奪。成化九年二月,茶質苔來率兵攻叛臣奢衛阿麻,乃為奢裡阿麻所敗。臣差劉寶亦被害。奢更阿麻自為君長,爭據 隅。奢裡阿麻尋死,族弟波籠阿麻繼統其徒,才弱力微,眾心不附。連年水旱,禾稼寡收,居民皆以澗毛山獸為命。適有粒食,即 致死傷。其民既為■部所擒,又為百種傜蠻所擄。群盜驅馳阡陌,往來山楸,伏藥矢以射居人,毒上流以絕行路。彼登山遐望,緣 木竊窺,或見海中行船,或聞林中人跡,即起煙吹角,嘯侶命儔。或率輕艇而掠海外之船,或馳健馬以奪林中之貨。加以虎狼犀 象,載路盈岐,惟有海道稱通,波濤甚惡。臣與占城君長久絕音書,凶盜憑陵,為平民患。臣守邊頭目黎文見賊虐日滋,出不得 已,放兵追逐。彼便緣澗登山,鼠竄林叢,更出迭入,使一方之人困於鋒鏑。成化九年三月初四日,奉睹敕諭,有雲,王國與占 城,勢力大小不待辨說。若彼先啟釁端,不度德量力,固為不義。若王無故乘彼小釁,輒興忿兵,凌弱暴寡,亦豈得為義乎?敕 至,王宜略其小失,益■大義,將所擄人口盡數發還。戒飭邊吏,毋生事邀功,興兵搆怨,旋致報復,自貽伊戚。臣拜讀反思,不 勝喜懼,震雷解雨,造化一心,臣即欽遵聖諭,凡擴獲男婦該七百四十一人,並已發還本國,思修大義,庶蓋前愆。其人皆被支麻 *彳*勞冰及羅撥所抄。臣重念聖諭,不覺驚惶,切惟天地大德,諒不偏於生成,臣子小心,詎可忘於敬畏。天地既嫗照以同仁,臣子 敢悖違而召禍。故臣受封至今,夙宵驚懼,常以不能保守朝廷土地人民為慮。豈敢取非所有,違訓背義,自速罪尤。臣雖至愚,能 辨禍福。臣又切思,當占城國強盛之時,奪臣國四川之地,臣於占城銜怨,圖報復其舊疆。今彼凋瘵紛拿,靡有統屬,勞民戍卒, 不遑啟居,臣追思昔日之安,期篤睦鄰之義。雖茶全敢違聖諭,搆怨稱兵,天鑒孔昭,自貽伊戚,而臣不與之校。數年已來,占城 人民隨而擾亂,上得罪於皇天子至聖,下叢怨於小民。臣願慮之間,曷勝憂懼,伏望皇帝陛下剛中建中,光大包荒,亮臣惕勵省 躬,敢啟併吞之念,憐彼流離失所,旋施綏定之恩,使彼眾下輯寧,同囿和熙之治,而臣兵民休息,永無烽火之虞,在聖智轉移之 妙機,非臣愚之能得窺測也。顧占城興廢,於臣國誠不相干;然占城亂亡,致臣邊反受其害。叩閽有請,自知逾越之難逃。忍毒無 言,詎耐擾攘之滋甚。臣南境之事,舉措皆難。■尾跋胡,礙於進退。倘皇上海涵春育,寬遠臣冒昧之誅,雨施雲行,體上天哀憐 之念,豈獨臣國之幸,抑一方生聚之大幸。而南服倪髦,望闕焚香,祝聖壽於萬萬年矣!」上命兵部議。

十一年,兵部尚書項忠等疏曰:「切緣海外諸番在荒服之外,正朔之所不加,教化之所不及,干戈相尋,互相吞噬,與中國利 害不相干涉。自古帝王略外治内,不勤兵於外夷,惟修政於中國。今安南、占城二國僻居海外,各守一隅,雖是世受王封,遠修職 貢不足為中國輕重。頃者黎灝大興兵甲,蹂躪占城地方,虜其國王妻小,殺其人民。劫其金印,燒燬房屋。而占城國王■羅茶悅, 累嘗差人赴京控訴,荷蒙皇上覆載無私。憑其奏詞,特降聖諭,俾黎灝改圖易輒,去惡從善,欲全二國生靈,各圖長守至計。續該 差去右給事中陳峻等奏,占城國王■羅茶悅一家俱被安南虜去,地方盡行占奪。又蒙皇上優容,待候陪臣來朝譯審處分。今黎灝特 遣陪臣進貢方物,歷敘占城國王兄弟謀逆不道,強臣北叛,人民被害等情,並不曾開奏奪占國土改為義南州名色,比與陳峻等往年 所奏不同。但恐陳峻等回京之後,彼已復還國土,尚未可知。欲行譯問差來陪臣,彼必隱諱,不敢顯揚國惡。合無待候進貢陪臣回 還,特請敕諭一道,齎赴安南國王黎灝,大意謂:畏天保國,善後之計;違天虐民,取禍之原。眷念安南、占城,鄰封接攘,氣類 相同,風俗不異。若論勢力,固有大小強弱不同,而輔車相依,唇亡齒寒,義當憂患見恤,不宜秦、越蔑視。今爾國雖奏占城國王 ■羅茶全節犯化州等界,及弟■羅茶遂弒主,被亂兵殺死,茶質苔來自立為主,國人愈叛,率兵攻叛臣奢裡阿麻,又被所敗,後奢 裡阿麻自為君長,尋死,族弟波籠阿麻繼,才弱力微,眾心不附,國土大亂。繼奉天朝敕諭,將擄獲男婦七百四十一人發回本國等 因。若憑所奏,有以見王始則出師有名,終則勉修大義,似可嘉尚。但先次占城國王■羅茶悅奏訴,被爾國差人索取犀象寶物不 從,起兵攻圍,捉拿臣兄連妻小五十餘口,搶掠寶印,燒燬房屋,殺其人民,占其地方,乞要襲封等情。及朝廷依憑所奏,差給事 中等官陳峻等到占城冊封回奏,占城國王一家俱被安南國虜去,地方盡被占奪,改為交南州名色,似與王今奏情詞抵捂。第恐粉飭 遮掩,緣道路隔絕,俱難辨別真偽。且占城國主正受王封,如使不恤國事,果犯疆界,殘害人民,謀逆不道,罪固難逃。若乃覆其 宗祀,遷其重器,殺其人民,占其地土,縱使快其心志,於大義有乖。況小國雖爾歷代相傳,載諸信史,未聞殄絕。今若一旦殄 滅,不與興繼,恐海外諸番睥睨覘覷,或有仗義執言,一呼而起,悔將何迫?若能復其宗祀,還其重器,返其人民,天朝亦汝嘉 矣。願氵是欽承,免貽後悔,仍具實奏聞。如此則在我辭嚴義正,不失懷柔之體。在彼情虛理屈,自萌改悟之心矣。」上從之。 :十年,國王復遣使請封。上命使臣馮■等往冊立之。至,則國王先為安南迫逐,徙居赤坎邦都郎。安南尋又遣兵攻殺之矣。 其臣提婆苔者攘據故國,馮■因誤封提婆苔為王。其國人上章陳訴。時馮■回自占城,卒於海上。副使某論罪戍邊。

按行人劉寅之本傳及各書所載,前次請封者止是■羅茶悅,未有茶全茶遂及苔來之名也。及據安南之奏,則稱茶遂弒茶全自立,苔來又弒茶遂自立。則茶悅未嘗主占城也。豈苔來懼有叛逆之名,而以其父名誆我耶?苔來既茶悅之子,越父繼統則置其父於何地?我使陳峻往封茶悅,不得入疆,事在成化十年,距茲又十年。則所云被安南攻殺者,又不知為茶悅為苔來也。茶悅奏稱安南提拿臣兄,則當是茶全也。豈苔來既弒茶遂而駕其禍於安南耶?今馮■誤封者又稱提婆苔,其與苔來不知還是二人或即一人訛為二名也。然安南侵逼之罪,固所必有,而占城內亂之事,亦不為虛。今俱不可考矣。但黎灝奏章乃六科日抄中全疏錄出,字字皆其原文。而野史多係傳聞,則提婆苔必是苔來之誤耳。

二十一年,上別遣使封故王之弟齊亞麻勿庵為王。未至,而齊亞麻勿庵先卒。上復遣給事中李孟陽封王之次弟古來為王。時安南納提婆苔而取其國。為申言古來不當嗣。古來航海至廣州,辯訴其冤。孟陽至廣州,上言:「占城險僻,安南搆兵未靖,而提婆苔又嘗竊據,今封古來,萬一安南弗順,損中國威。宜傳命古來歸國聽勘,仍敕安南悔過。」上悉從之。命兩廣督府主其事。都御史屠氵庸屬廣東參議姜英往勘。國人僉謂古來實王弟,有名者,宜繼國統,奏聞。〉庸遂移檄諭安南,數其不能恤鄰之罪,折其奸萌而導之順逆。安南聽命,不敢肆。孟陽乃致古來於崖州,受封而去。〉庸複選官軍二千,令東管商人張宣領之,護送古來至新州港,得反國。

按孟陽字時雍,號南岡,世為睢之長岡裡人。登成化壬辰進士,為戶科給事中。癸卯,查盤大同錢糧,值虜入寇,危甚,歸陳邊務十事。使占城,留廣中,遙擢兵科都給事中。數年,克定古來之封。弘治戊申,始歸朝,陳地方五事曰:「懲舊敝以修軍政;

設兵備以鎮邊方;開衙門以散嘯聚;修城垣以禦寇患;通朝報以廣德意。」多見採納。尋擢湖廣參政,歷南京工部尚書。正德丙寅,上疏致仕,有清慎老成之褒。賜誥給驛月廩。歲隸,享年七十有八。

弘治三年,古來上疏言:「往者安南不道,納臣叛將,奪臣國以授之,冒受天朝之封。賴先皇帝大恩,命都憲屠公委官疏嶺海察事機,文告安南,使臣獲有今日,皆聖天子之盛德與屠公之功也。臣表謝外有白金若干錠、黃金器飾若干事、異香番物若干奩,附使者謝屠公,敢昧死以請。」上命〉庸受之。〉庸固辭曰:「綏遠之仁,繼絕之義,在聖天子。臣何功之有!」上嘉其誠,命禮部籍而時於官。

按洪武中,日本遣使請文於宋濂。敕濂撰文。日本獻百金為謝,濂隙不受。上知問,濂對曰:「天朝侍從受小夷金,非所以崇國體。」今屠氵庸定占城之功,既非撰文之比,古來表奉謝氵庸亦非自獻之私。氵庸不敢當,其視宋濂益有光矣。但氵庸既不受,則朝廷當■而還之。且明賜敕諭,言其亂亡之後,匱乏之秋,方將憫恤於爾,給助扶植。今爾反有黃金之謝,原爾感恩思報之情。若可令氵庸強受,據我以大字小之仁,豈圖爾國謝儀!爾果沐德難忘,則恪守王章,效忠勿替。其所報於氵庸,斯為至矣,奚以金為!如此則於國體尤為正大,不亦愈於貯官之處乎!

十八年,古來卒。其子沙古卜洛來請嗣爵。

正德五年,遣給事中李貫、行人劉文瑞齎敕往封之。

文瑞字廷麟,廣東新會人。登正德辛未進士,授行人。占城請封,當遣使,推擇文瑞以往。事竣,擢刑科給事中。後武宗時,屢出巡遊。文瑞抗疏請回鑾,數千言,不報。升湖廣僉事,抵家卒。文瑞為人慷慨,不計嬴乏。卒之日,斂葬不給,鄉人賢之。

嘉靖元年,占城及暹邏等國商泊至廣東。時太監牛榮提督市泊司。乘其貨未報稅,命家人蔣義私與交易,收買各物。事發,蔣 義抵罪,貨沒於官。(詳見暹邏國中)自後貢使依期至,亦不能如朝鮮之繹絡有常雲。

其國,凡王在位三十年,即入山,茹素受戒。令子姪攝國。居一歲,吁天矢曰:「我不道,當充虎狼食或病死。」期年,得無恙,復入為王。於是國人呼為「芳■黎焉哈剌札」焉。

按入山復辟,舊志所載如此。然觀王卒方請封爵,則今亦無此事矣。必上世未通中國之時,乃或有是耳。

國中天無霜雪,氣候常熱如夏。木長青,隨花隨結。煮海水為鹽,禾稻甚薄,國人粒食者鮮。

按雜誌載,占城有一稻,其種耐早而早熟。宋真宗聞其名,求種分給江淮兩浙,擇田之高者種之。即今南方早稻尖米,謂之黃 ■山,又云占城稻者是已。則彼國豈少粒食,皆傳聞之未的耳。

人惟食檳榔,裹萋葉,包蠡殼灰,行住坐臥不絕於口。土無絲繭,以白■布纏其胸,垂至足,衣衫窄袖。撮發為結,散垂為 {髟肖}於後。其王腦後■結散,被吉貝衣(或云白衣),戴三山金花玲瓏冠,七寶裝,瓔珞為飾,躡革履,無襪(或云跌足),股 脛皆露。乘象或黃犢車。臣茭葉冠,男蓬頭,衣紫衣。若衣畜黃,罪死。出入亦乘象馬。婦人亦腦後撮結,無笄梳,其服及拜揖與 男子同。王鑄金為廟主。其畜多黃牛水牛,無驢。有山牛不任耕耨,但殺以祭鬼。將殺,令巫祝之曰:「阿羅和及扳。」譯語曰:「早教他托生。」其互市無緡錢,用金銀,較量錙銖。或吉貝錦,定博易之直。有疾,旋彩生藥服食。地不產茶。酋長所居,屋宇門牆俱磚灰瓷,及以堅木雕鏤獸畜之形為革,外周磚垣。亦有城郭兵甲之防,藥鏃刀標之屬。其部領所居亦分等第。門高有限,民下編茅,覆屋不得逾三尺。魚不腐爛不食,釀不生蛆不為美。酒釀時,以米拌藥丸乾和入甕中,封固如法,收藏日久,其糟生蛆為佳醞。他日開封,用長節竹幹三四尺者揀入糟甕中,或團坐五人,量人入水多寡,輪次吸竹,引酒入口,吸盡再入水,若無味則止。有味留封再用(或曰不會釀醞,惟飲椰子酒)。酋長歲時彩生人膽入酒中,與家人同飲。正當賀日,沐人膽汁,將領獻人膽為賀,謂之通身是膽。

其俗獷悍,勇於戰鬥(或曰其人甚弱)。尚釋教。每正月一日,牽象周行所居之地,驅逐出郭,謂之逐邪。四月有游船之戲。定十一月十五為至日,人皆相賀。每十二月十五日,城外縛木塔,王及人民施衣服香藥置塔上,焚之以祭天。刑禁亦設枷鎖,小過以藤杖鞭之,或五六十至百。當死者以繩係於樹,用梭槍舂其喉而殊其首。若故殺劫殺,令象踏之,或以鼻卷撲於地,象皆素習。犯奸者男女共入牛贖罪。有屍頭蠻者,本是婦人,但無瞳神為異。其婦與家人同寢,夜深飛頭而去食人穢物,飛回複合,其體即活如舊。若知而封固其項,或移體別處,則死矣。人有病者,臨糞時遭之,妖氣入腹必死。此婦人亦罕有,民間有而不報官者,罪及一家。番人戲之觸弄其頭,必有生死之恨。國無紙筆,以羊皮捶薄,薫黑,削細竹為筆,蘸白灰書,字若蚯蚓委曲之狀。言語燕■,全憑通事傳譯。

按占城既通文字,且有秀才,則紙筆乃其所有。雖言語不通於中國,而其詩文與華夏頗亦近似。若灰書之說,恐亦上世之事, 而非今時之陋也。

其山曰金山,在林邑故國。山石皆赤色,其中產金。金夜則出飛,狀如螢火。曰不勞山,在林邑浦外。國人犯罪,送此山令自 死。

其產:金、銀、錫、鐵、獅、象、犀、牛。民獲犀象,皆輸於王。周顯德中,嘗賈雲龍形通犀帶。犀角、象牙最多。犀如水牛,大者八百斤,體黑無毛,蹄有三■合,獨角在鼻端,長者可尺五寸。馬小於騾。■毒瑁、伽南木香、朝霞大火珠(大如雞卵,狀類水晶。當午置日中,以艾藉之,輒火出)、菩薩石、薔薇水(灑衣,經歲香不歇)、猛火油(得水愈熾,國人用以水戰)、乳香、沉香、檀香、丁香、檳榔、茴香、烏柄木(土人樵之為薪)、蘇木、胡椒、蓽澄茄、白藤、吉貝(吉貝樹名,其萃盛時如鵝毳,抽其緒紡之,以作布。亦染成五色,織為班布)、絲紋布、白■布、貝多葉、龍腦香、甘蔗、紅蕉子、椰子、波羅蜜(形如東瓜)、孔雀、川雞。

其貢:象、象牙、犀角、孔雀、孔雀尾、橘皮、抹身香、龍腦、薰衣香、金銀香、奇南香、按奇南出在一山。酋長差人禁民不得採取。犯者斷其手,則在彼處亦自貴重,宜中國以為珍也。其香甚清遠,中國制以為帶,有直至百金者。但《星槎勝覽》作琪楠,潘賜使外國回,其王餽之。載在志,則作奇藍,此當是的。

土降香、檀香、柏木、燒碎香、花梨木、烏木、蘇木、花藤香、蕪蔓、番沙紅印花布、油紅綿布、白綿布、烏綿木圓壁花布、 花紅邊縵、雜色縵、蕃花手巾、蕃花手帕、兜羅綿、被洗白布泥。其朝,三年一期。

其裡:東至東海,西雲南,南真臘,北安南,東北廣東(順風半月程,■州七日程),達於京師。我使往者自閩長樂五虎門西南行,順風可十日至東北百里海口。立石塔為標,舟至是係焉。

按志載,邊永,河間任丘人。正統乙丑進士,拜行人。景泰壬申,使占城。其國人素狙詐,永誠以待之,禮以節之,以禍福利害曉之,國人信服。又葉應,廣東歸善人。登成化戊戌進士,初授行人。給賞廣西,頒封占城,以廉謹稱。此皆曾將占城之命者。但邊永失其所役何事,葉應失其所往何歲,難編次於本國傳中,今姑附此以俟補。

又元詩人陳孚出使安南,有紀事之詩曰:「鼻飲如瓴<■瓦>,頭飛似轆轤。」蓋言土人能以鼻飲酒者,有頭能夜飛於海食魚,曉復歸身者。然《嬴蟲集》中亦載老撾國人鼻飲水漿,頭飛食魚。今占城有頭飛者,乃特婦人也。占城、安南、老撾,其地相接,宜有是種。若《七修類稿》載,近時中國有一人名汪海云者,亦能鼻飲頭飛。此則怪事矣。因附於此,以志異焉。

又《星槎勝覽》載,占城不解正朔,但看月生為初,月晦為盡,如此十次盈虧為一歲。晝夜善捶鼓,十更為法。酋長及民下非至午不起,非至子不睡。見月則飲酒歌舞為樂。然觀吳惠日記,有上元煙火之宴,則已知有節候,非但視月生晦者。惠雲,夜鼓以八更為節,又與十更異矣。大抵外國雖陋,久與中華往來,漸沾王化。時異制殊,前後難以概視耳。又占城物產有所謂觀音竹者,如藤,長丈八尺許,色黑如鐵,每節長二三寸。此亦《勝覽》所不載者。